

寶前兩溪志畧卷十

歸安吳玉樹靈圃氏編輯

釋老

二氏之道吾不知也然其間逃名隱跡固多偉人
凡近於幻術頑空概不採錄其有裨於風教者存
之勿責余掛漏也誌釋老

明

蓬頭僧不知何許人住法華庵耕田自給不事佛經嘗
于水面取黃菜葉作餐或笑之僧曰黃菜葉只要飽
若要好討煩惱一日遍辭里人示期坐化顏色如生
異香遍里啟其榻有貝葉一張上書梵字

寶十

一 嘉業堂校刊

國朝

淨慈獅子吼寺僧有戒行後住金粟以煩雜退歸居禪
慧寺寺甚荒僻師居不數月蒔花薙草修整一新儼
然一古叢林也壽七十圓寂時遠近如聞異香
洽齡鹿苑寺僧族姓徐自幼不苟葷喜禪理十歲入寺
受戒終日禮誦無他事設放瑜伽餽口極有奇驗乾
隆間菁山毛蟲食松葉爲害邑中仕宦塋墓多半在
菁蔭木幾食盡而無計除之有宦者謁師請除師固
辭請益虔師遂往焉設放餽口一壇比明蟲皆墮地
大小成毬而死三日墜盡又有費某家患怪飛沙拋
石放火跌人無所不至乃請真人府法官驅之不克

尋遁去遂敦請師設放燄口竟貼然不復擾矣壽七十餘而逝與羽士沈一炳友善

以上釋氏

寶十

二

唐

馬湘字自然杭人常遊湖州以醉墮霽溪經日方出坐
水上衣履不溼每賒酒白塔巷酒肆一日謂主人曰
我得仙矣酬爾酒價出囊中藥投鐵器竝爲紫金又
居寶溪上賣錫爲業一日輒語鄰曰我賣錫已三年
矣其與兒女食何多與父母食何其罕與悉投錫於
溪攜妻子乘舟而去里人疑卽馬仙覘之舟忽躍入
雲中舉手笑別居傍有橋因名望仙居南有溪名仙
溪乃躍舟之所也明吳世淳詩云聞說仙翁馬自然
仙溪溪上住經年石橋南望溪如舊一片白雲何處
邊

寶十

三

國朝

沈一炳字谷音世居前邱幼年好道得龍門法錄于文
昌閣莫之解遂遍遊天台終南諸大名山遇異人授
三一經啟之乃道德經中庸多心經也遂得悟惟以
誠敬爲功呼叱鬼神驅笞魔怪雍正癸丑亢旱時師
年止二十餘罔有知其術者師不忍膜視乃奮然起
曰請嘗試之爰于清溪橋上設桌二三重跪赤日中
默禱咬舌書符歷一時許有黑雲自東北來須臾甘
霖大霑而當事者竟莫知之南陔柯煜立亭潘汝誠
皆有詩贈家我雪公有詩云奇哉一羽士濟物道心
堅睠此農氓苦血書顙上天赤腳曝日中喝死奚恤

焉一誠信足感竟得屏翳憐甘澍霎時足歡聲騰陌
阡贈詩有丹邱贊歎非徒然潘生念桑梓亦投鴉青
牋我田有負郭對之喜不眠濡筆遂誌之簷角猶潺
湲乾隆乙巳亢旱當事敦請祈雨甘霖隨至後坐化
于開化院面色如生

以上老氏

寶十

四

寶前兩溪志畧卷十